

30 MAY 2002

MAHATHIR-CABARAN

NEGARA PERLU SEDIA HADAPI CABARAN, KATA DR MAHATHIR

PUTRAJAYA, 30 Mei (Bernama) -- Datuk Seri Dr Mahathir Mohamad hari ini berkata negara perlu bersedia menghadapi cabaran dan risiko ketidakpastian pemulihan ekonomi dunia yang masih belum meyakinkan walaupun kedudukan ekonomi negara semakin menggalakkan.

Perdana Menteri menegaskan bahawa dalam perkembangan globalisasi dan teknologi yang sentiasa berubah dengan pantas, daya saing perlu dipertingkatkan di samping mengukuhkan ketahanan ekonomi negara.

"Kita perlu mempelbagaikan punca pertumbuhan ekonomi dan mengurangkan risiko pergantungan berlebihan kepada beberapa barangan sahaja," katanya ketika berucap pada sesi pertama majlis dialog Belanjawan 2003 dengan agensi-agensi kerajaan serta dewan-dewan perniagaan di sini.

Dr Mahathir, yang juga Menteri Kewangan, berkata usaha juga perlu dipergiatkan untuk memperluaskan asas perindustrian negara dan memberi tumpuan yang lebih kepada pembangunan sektor pertanian dan perkhidmatan termasuk bidang pelancongan, pendidikan, kesihatan, kewangan dan pengangkutan.

Menurutnya, dalam usaha mencergaskan kegiatan ekonomi dan memantapkan lagi asas-asas ekonomi supaya negara lebih berdaya saing, peranan sektor swasta amat penting.

Perdana Menteri berkata sejak kebelakangan ini, sektor swasta tidak begitu dinamik.

"Paras pelaburan mereka telah merosot dengan ketara sebanyak 39 peratus pada tahun 2001 berbanding paras pelaburan pada tahun 1997. Jika trend ini berterusan, potensi pertumbuhan ekonomi dalam jangka sederhana dan panjang akan terjejas," kata beliau.

Menurutnya, pencapaian ekonomi negara sejak krisis kewangan telah banyak didorong oleh sektor awam terutama melalui langkah rangsangan fiskal yang mengakibatkan kewangan Kerajaan Persekutuan mengalami defisit.

Meskipun defisit ini mampu dibiayai dan pengurusan fiskal masih berhemat, namun begitu, bukanlah menjadi hasrat kerajaan untuk terus mengamalkan dasar belanjawan mengembang, katanya.

"Kita tidak boleh terlalu bergantung kepada kerajaan untuk mencergaskan kegiatan ekonomi."

Dr Mahathir menegaskan bahawa penglibatan sektor swasta perlu dipertingkatkan semula untuk mengambil alih peranan sektor awam sebagai penggerak ekonomi.

"Sektor swasta perlu membina semula keupayaan dan keyakinan ke arah meningkatkan daya saing, kecekapan, kreativiti dan produktiviti.

"Mereka juga perlu berani mengambil risiko dalam merebut peluang perniagaan dan perdagangan yang luas dalam era globalisasi dan liberalisasi," tegas beliau.

Untuk itu, kata beliau, strategi Belanjawan 2003 akan memberi tumpuan kepada usaha-usaha untuk meningkatkan peranan sektor swasta selaras dengan tema dialog belanjawan tahun ini iaitu "Memupuk Sektor Swasta yang Dinamik dan Berdaya Tahan."

Dr Mahathir berkata sebagai sebuah ekonomi terbuka Malaysia terdedah kepada perkembangan ekonomi dunia.

Walaupun ekonomi dunia mengalami kelembapan pada tahun lepas, negara masih berjaya mencatatkan pertumbuhan ekonomi yang positif iaitu sebanyak 0.4 peratus, berbanding beberapa negara lain di rantau ini yang mengalami pertumbuhan negatif.

Bagi suku pertama tahun ini, pertumbuhan ekonomi negara telah berkembang kembali sebanyak 1.1 peratus berbanding dengan kemerosotan sebanyak 0.9 peratus pada suku ketiga dan 0.5 peratus pada suku keempat tahun lalu.

Perdana Menteri berkata pertumbuhan semula itu didorong oleh kecergasan yang berterusan dalam aktiviti sektor perkhidmatan dan pembinaan serta peningkatan perbelanjaan permintaan dalam negeri.

"Pencapaian ini adalah hasil daripada keberkesanan pelaksanaan dasar dan strategi kerajaan untuk bertindak segera dengan cara kita sendiri bagi menangani perubahan persekitaran luar yang tidak menentu," tegasnya

la juga disokong oleh asas-asas ekonomi yang semakin mantap, tambah Dr Mahathir.

Menurutnya, asas-asas ekonomi negara yang kukuh bukan sahaja telah memberi fleksibiliti bahkan membolehkan kerajaan mengambil pendekatan tersendiri yang bersesuaian dalam melaksanakan dasar fiskal dan kewangan untuk menyokong pertumbuhan ekonomi.

Dr Mahathir berkata rizab antarabangsa pada pertengahan Mei tahun ini terus meningkat kepada RM124.5 billion, mampu membiayai 5.5 bulan import tertanggung dan melebihi 5 kali daripada hutang luar jangka pendek negara.

Negara juga turut mencatatkan lebih perdagangan selama 53 bulan berturut-turut sejak November 1997.

"Tabungan negara yang tinggi membolehkan kita memenuhi keperluan pembiayaan pembangunan negara tanpa bergantung kepada sumber kewangan luar," katanya.

Dengan demikian, kata beliau, hutang luar negara dapat terus dikekalkan pada paras yang rendah.

Perdana Menteri juga berkata bahawa iklim pelaburan negara yang semakin baik telah berjaya menarik pelabur asing walaupun kadar cukai korporat negara lebih tinggi berbanding dengan sesetengah negara jiran serantau.

Katanya, rejim pencukai yang rendah tidak semestinya akan menjamin sesebuah negara itu dapat menarik lebih banyak pelaburan asing sepertimana berlaku di beberapa negara lain, termasuk Hong Kong.

"Meskipun struktur cukai korporat kita mungkin dianggap tinggi oleh sesetengah pihak, namun jika kita mengambil kira pemberian pelepasan dan pengecualian cukai insentif secara keseluruhannya, cukai efektif benar negara adalah antara yang terendah."

Dr Mahathir juga menasihati pengusaha tempatan, terutamanya perusahaan kecil dan sederhana, supaya bergiat lebih cergas bersama-sama syarikat multinasional untuk maju.

Kerjasama ini bertujuan untuk meningkatkan pelaburan mereka agar mereka boleh menjadi nadi penggerak perindustrian negara dan akan menjadi sebuah syarikat multinasional bertaraf dunia, tambah beliau.

-- BERNAMA

MAS MKO OS